

四庫全書

集部

欽定四庫全書

集部

御定全唐詩錄卷十九

詳校官左中允<sub>臣</sub> 瑋五珠

主事銜<sub>臣</sub> 徐以坤覆勘

總校官原任中允<sub>臣</sub> 王燕緒

校對官中書<sub>臣</sub> 嵇承志

謄錄監生<sub>臣</sub> 熊夢祖

欽定四庫全書

御定全唐詩錄卷十九

王季友

季友河南人按豫章圖經云鄴城人家貧賣履博  
極羣書季勉引為賓客甚敬之善為詩杜甫詩云  
鄴城客子王季友是也

殷璠云季友詩愛奇務險遠出常情之外然而白  
首短褐良可悲夫

古體詩

雜詩

采山仍采隱在山不在深持斧事遠遊固悲匠者心翳  
翳青桐枝樵爨日所侵樵聲出巖壑四聽無知音豈為  
鼎下薪當復堂上琴鳳鳥久不棲且與枳棘林

滑中贈崔高士瑾

夫子保藥命外身得无咎日月不能老化腸為筋否十  
年前見君甲子過我壽于何今相逢華髮在我後近而

知其遠少見今白首遙信蓬萊宮不死世世有元石采  
盈擔神方秘其肘問家惟指雲愛氣常言酒攝生固如  
此履道當不朽未能太元同願與天地久實腹以芝朮  
賤體仍芻狗自勉將勉余良藥在苦口

寄韋子春秘書

出山秘芸署山木已再春食我山中藥不憶山中人山  
中誰余密白髮日相親雀鼠晝夜無知我厨廩貧有情  
盡捐棄土石為周身依依舍北松不厭我南鄰夫子質

千尋天澤枝葉新余以不材壽非智免斧斤

還山留別長安知己

出山不見家還山見家在山門是門前此去長樵採青  
谿誰招隱白髮自相待惟餘澗底松依依色不改

代賀若令譽贈沈千運

相逢問姓名亦存別時無子今有孫山上雙松長不改  
百家唯有三家村村南村西車馬道一宿通舟水浩浩  
澗中磊磊十里石河上淤泥種桑麥平坡冢墓皆我親

滿田主人是舊客舉聲酸鼻問同年  
十人七人歸下泉  
分手如何更此地回頭不語淚潸然

酬李十六岐

鍊丹文武火未成賣藥販履俱逃名  
出谷迷行洛陽道  
乘流醉卧滑臺城城下故人久離怨  
一歡適我兩家願  
朝飲杖懸沽酒錢暮餐囊有松花飯  
于何車馬日憧憧  
李膺門館爭登龍千賓揖對若流水  
五經發難如叩鐘  
下筆新詩行滿壁立談古人坐在席  
問我草堂有卧雲

知我山儲無儋石自耕自刈食為天如鹿如麋飲野泉  
亦知世上公卿貴且養丘中草木年

宿東谿李十五山亭

上山下山入山谷谿中落日留我宿松石依依當主人  
主人不在意亦足名花出地兩重階絕頂平天一小齋  
本意由來是山水何用相逢語舊懷

觀于舍人壁畫山水

野人宿在人家少朝見此山謂山曉半壁仍棲嶺上雲



開簾欲放湖中鳥，獨坐長松是阿誰。  
再三招手起來遲，于公大笑向予說。  
小弟丹青能爾為。

張志和

志和字子同，婺州人。始名龜齡，母夢楓生腹上，而產，擢明經。肅宗命待詔翰林，因賜今名。後坐貶，不復仕。居江湖，自稱煙波釣徒。著玄真子，亦以自號。時謂嚴光之比。

古體詩

漁父歌

西塞山前白鷺飛  
桃花流水鱖魚肥  
青箬笠綠蓑衣  
斜風細雨不須歸

釣臺漁父褐為裘  
兩兩三三舴艋舟  
能縱棹慣乘流  
長江白浪不曾憂

雪谿灣裏釣漁翁  
舴艋為家西復東  
江上雪浦邊風笑  
著荷衣不歎窮

松江蟹舍主人歡  
菰飯莼羹亦共餐  
楓葉落荻花乾  
醉

宿漁舟不覺寒

青草湖中月正圓  
巴陵漁父棹歌連  
釣車子  
檝頭船樂  
在風波不用仙

近體詩

漁父

八月九月蘆花飛  
南谿老人垂釣歸  
秋山入簾翠  
滴滴野艇倚檻雲  
依依却把漁竿尋  
小逕閒梳鶴髮對斜暉  
翻嫌四皓曾多事  
出為儲皇定是非

沈千運

千運吳興人元結篋中集序云風雅不作幾及千  
年近世作者更相沿襲拘限聲病喜尚形似且以  
流易為辭不知喪於雅正吳興沈千運獨挺於流  
俗之中強攘於已溺之後窮老不惑五十餘年凡  
所為文皆與時異故朋友後生稍見師效能似類  
者有五六人於戲自沈公及二三子皆以正直而  
無祿位皆以忠信而久貧賤皆以仁讓而至喪亡

兵興于今六歲已長逝者遺文散失方阻絕者不見近作故編於篋中者凡二十四首云

古體詩

贈史修文

故人阻千里會面非前期握手於此地當歡反成悲念  
離究猶昨俄已二十晷疇昔皆少年別來鬢如絲不道  
舊姓名相逢知是誰曩遊盡騫翥與君仍布衣豈曰無  
其才命理應有時別路漸欲少不覺生涕洟

汝墳示弟妹

今日天氣暖東風杏花圻筋力久不如却羨澗中石神  
仙杳難信中壽稀滿百近世多天傷喜見鬢髮白杖藜  
竹樹間宛見舊行跡豈知林園主却是林園客兄弟所  
存半空為亡者惜冥冥無再期哀哀望松柏骨肉能幾  
人年大自踈隔性情誰免此與我不相易唯念得爾輩  
相看慰朝夕平生茲已矣此外盡非適

濮中言懷

聖朝優賢良草澤無遺匿人生各有命在余胡不淑一  
生但區區五十無寸祿衰退當棄捐貧賤招毀讟栖栖  
去入世屯躓日窮迫不如守田園歲晏望豐熟壯年失  
宜盡老大無筋力始愴前計非將貽後生福童兒新學  
稼少女未能織顧此煩知已終日求衣食

山中作

棲隱別無事所願離風塵不辭城邑遊禮樂拘束人適  
來歸山林庶事皆吾身何者為形骸誰是智與仁寂莫

了閑事而後知天真咳唾矜榮華迂俯相屈伸何如巢  
與由天子不得臣

古歌

北邙不種田但種松與栢松栢未生處留待市朝客

孟雲卿

雲卿平昌人第進士為校書郎與杜甫元結最善

按元結送孟校書往南海書序云雲卿與次山同  
里以辭學相友善



素郊甘澤謠云陶峴開元中與樊口進士雲卿奏  
清商曲於江湖號水仙是雲卿為武昌人

高仲武云孟君詩祖述沈千運賊中十首又漁獵  
陳拾遺詞氣傷苦怨者之流

古體詩

古別離

朝日上高臺離人怨秋草但見萬里天不見萬里道君  
行本迢遠苦樂良難保宿昔夢同衾憂心常傾倒含酸

欲誰訴展轉傷懷抱結髮年已遲征行去何早寒暄有時謝憔悴難再好人皆算年壽死者何曾老少壯無見期水深風浩浩

今別離

結髮生別離相思復相保如何日已久五變中庭草渺渺大海途悠悠吳江島但恐不出門出門無遠道遠道行既難家貧衣復單巖風吹積雪晨起鼻何酸人生各有志豈不懷所安分明天上日生死願同歡

鄴城懷古

朝發淇水南將尋北燕路魏家舊城闕寥落無人住伊  
昔天地屯曹公獨中據羣臣將北面白日忽西暮三臺  
竟寂莫萬事良難固雄豪安在哉衰草沾霜露崔巍長  
河北尚見應劉墓古樹藏龍蛇荒茅伏狐兔永懷故池  
館數子連章句逸興驅山河雄詞變雲霧我行覩遺跡  
精爽如可遇斗酒將酹君悲風白楊樹

傷懷贈故人

稍稍晨鳥翔浙浙草上霜人生早懼苦壽命恐不長二十學已成三十名不彰豈無同門友貴賤易中腸驅馬行萬里悠悠過帝鄉幸因絃歌末得上君子堂衆樂互喧奏獨子備笙簧坐中無知音安得神揚揚願因高風起上感白日光

傷情

為長心易憂早孤意常傷出門先躊躇入戶亦彷徨此生亦何苦前事安可忘兄弟先我沒孤幼盈我旁舊居

近東南河水新為梁松栢今在茲安忍思故鄉四時與  
日月萬物各有常秋風已一起草木無不霜行行當自  
勉不忍再思量

汴河阻風

清晨自梁宋挂席之楚荆出浦風漸惡傍灘舟欲橫大  
河噴東注羣動皆窅冥白霧魚龍氣黑雲牛馬形蒼茫  
迷所適安危懼暫寧信此天地內孰為身命輕丈夫苟  
未達所向須存誠前路捨舟去東南仍曉晴

近體詩

寒食

二月江南花滿枝他鄉寒食遠堪悲  
貧居往往無煙火不獨明朝為子推

張謂

謂字正言河南人登天寶二年進士第奉使長沙  
嘗作長沙風土記大厯中為禮部侍郎典貢舉

殷璠云謂代北州老翁答及湖中對酒行並在物

情之外衆人未曾說耳亦何必歷遐遠探古迹然  
後始為冥搜

古體詩

讀後漢逸人傳

子陵沒已久讀史思其賢誰謂潁陽人千秋如比肩嘗  
聞漢皇帝曾是曠周旋名位苟無心對君猶可眠東過  
富春渚樂此佳山川夜卧松下月朝看江上煙釣時如  
有待釣罷應忘筌生事在林壑悠悠經暮年于今七里

瀨遺迹尚依然高臺竟寂莫流水空潺湲

龐公南郡人家在襄陽里何處偏來往襄陽東陂是誓  
將業田種終得保妻子何言二千石乃欲勸吾仕鸛鵲  
巢茂林龜鼈穴深水萬物從所從吾心亦如此不見鹿  
門山朝朝白雲起采藥復采樵優游終暮齒

代北州老翁答

負薪老翁住北州北望鄉關生客愁自言老翁有三子  
兩人已向黃沙死如今小兒新長成明年聞道又徵兵



定知此別必零落不及相隨同死生盡將田園借鄰伍  
且復伶俜去鄉土在生本求多子孫及有誰知更辛苦  
近傳天子尊武臣強兵直欲靜邊塵安邊自合有長策  
何必流離中國人

湖上對酒行

夜坐不厭湖上月晝行不厭湖上山眼前一樽又長滿  
心中萬事如等閑主人有黍百餘石濁醪數斗應不惜  
即今相對不盡歡別後相思又何益茱萸灣頭歸路賒

願君且宿黃公家風光若此人不醉參差辜負東園花

贈喬琳

一作劉春虛詩

去年上策不見收今年寄食仍淹留羨君有酒能便醉  
羨君無錢能不憂如今五侯不愛客羨君不問五侯宅  
如今七貴方自尊羨君不過七貴門丈夫會應有知己  
世上悠悠何足論

近體詩

送裴侍御歸上都

楚地勞行役秦城罷鼓鞶舟移洞庭岸路出武陵谿江  
月隨人影山花趁馬蹄離魂將別夢先已到關西

道林寺送莫侍御

何處堪留客香林隔翠微薜蘿通驛騎山竹挂朝衣霜  
引臺烏集風驚塔雁飛飲茶勝飲酒聊以送將歸

別睢陽故人

少小客遊梁依然似故鄉城池經戰陣人物恨存亡夏  
雨桑條綠秋風麥穗黃有書無寄處相送一沾裳

郡南亭子宴

亭子春城外朱門向綠林  
柳枝經雨重松色帶煙深  
漉酒迎仙客穿池集水禽  
白雲常在眼聊足慰人心

夜同宴用人字

北斗回新歲東園值早春  
竹風能醒酒花月解留人  
邑宰陶元亮山家鄭子真  
平生頗同道相見日相親

過從弟制疑官竹齋

羨爾方為吏衡門獨宴如  
野猿偷紙筆山鳥污圖書  
竹

裏藏公事花間隱使車不妨垂釣坐時繪小江魚

同王徵君湘中有懷

八月洞庭秋瀟湘水北流還家萬里夢為客五更愁不  
用開書帙偏宜上酒樓故人京洛滿何日復同遊

同諸公遊雲公禪寺

共許尋雞足誰能惜馬蹄長空淨雲雨斜日半虹霓簷  
下千峰轉窻前萬木低看花尋徑遠聽鳥入林迷地與  
喧卑隔人將物我齊不知樵客意何事武陵谿

別韋郎中

星軺計日赴岷峨，雲樹連天阻笑歌。  
南入洞庭隨雁去，西過巫峽聽猿多。  
崢嶸洲上飛黃蝶，滌瀨堆邊起白波。  
不醉郎中桑落酒，教人無奈別離何。

杜侍御送貢物戲贈

銅柱朱崖道路難，伏波橫海舊登壇。  
越人自貢珊瑚樹，漢使何勞獬豸冠。  
疲馬山中愁日晚，孤舟江上畏春寒。  
由來此貨稱難得，多恐君王不忍看。

春園家宴

南園春色正相宜  
大婦同行小婦隨  
竹裏登樓人不見  
花間覓路鳥先知  
櫻桃解結垂簷子  
楊柳能低入戶枝  
山簡醉來歌一曲  
參差笑殺郢中兒

西亭子言懷

數叢芳草在堂陰  
幾處閒花映竹林  
攀樹玄猿呼郡吏  
傍谿白鳥應家禽  
青山看景知高下  
流水聞聲覺淺深  
官屬不令拘禮數  
時時緩步一相尋

送盧舉使河源

故人行役向邊州  
匹馬今朝不少留  
長路關山何日盡  
滿堂絲竹為君愁

題長安主人壁

世人結交須黃金  
黃金不多交不深  
縱令然諾暫相許  
終是悠悠行路心

早梅

一樹寒梅白玉條  
迴臨村路傍谿橋  
不知近水花先發



疑是經春雪未消

張巡

巡鄆州南陽人與兄曉皆以文行知名舉進士天  
寶中授清河令有能名調真源令祿山反與睢陽  
太守許遠嬰城自守經年乏食忠義不衰城陷遇  
害

近體詩

聞笛

名堯試一臨虜騎附城陰不辨風塵色安知天地心營  
開邊月近戰苦陣雲深旦夕更樓上遙聞橫笛音

守睢陽作

接戰春來苦孤城日漸危合圍侔月暈分守若魚麗屢  
厭黃塵起時將白羽揮裏瘡猶出陣飲血更登陴忠信  
應難敵堅貞諒不移無人報天子心計欲何施

顏真卿

真卿字清臣琅琊人少勤學業有詞藻尤工書開

元中舉進士事親以孝聞累遷侍御史武部員外  
不附楊國忠出為平原太守祿山反河朔盡陷平  
原獨守肅宗幸靈武授工部尚書至德初朝于鳳  
翔授憲部尚書累進封魯郡公以忤宰相意出刺  
撫州湖州元載伏誅拜刑部尚書改太子太師李  
希烈反盧杞奏遣真卿往諭之不屈遇害

古體詩

題杼山癸亭得暮字

亭陸鴻漸所創

村山多幽絕勝事盈跬步前者雖登攀淹留恨晨暮及  
茲紆勝引曾是美無度歛構三癸亭實惟陸生故高賢  
能利物疏鑿皆有趣不越方丈間居然雲霄遇巍峩倚  
修岫曠望臨古渡左右苔石攢低昂桂枝蠹山僧狎猿  
狄巢鳥來枳棋俯視何楷臺傍瞻戴顓路遲迴未能下  
夕照明村樹

謝陸處士村山折青桂花見寄之什

羣子遊村山山寒桂花白綠萸含素萼采折自逋客忽

枉巖中詩芳香潤金石全高南越靈  
豈謝東堂策會愜  
名山期從君恣幽覲

贈裴將軍

大君制六合猛將清九垓戰馬若龍虎騰凌何壯哉將  
軍臨八荒烜赫耀英材劍舞若游電隨風縈且迴登高  
望天山白雲正崔巍入陣破強寇威名雄震雷一射百  
馬倒再射萬夫開匈奴不敢敵相呼歸去來功成報天  
子可以畫麟臺

近體詩

登平望橋下作

登橋試長望望極與天平際海兼葭色終朝鳧雁聲近  
山猶髣髴遠水忽微明更覽諸公作知高題柱名

刻清遠道士詩因而繼作

不到東山寺于今五十春  
竭來從舊賞林壑宛相親  
吳子多藏日秦王厭勝辰  
劍池穿萬仞盤石坐千人  
金氣騰為虎琴臺化若神  
登壇仰生一捨宅歎珣珉  
中嶺分

雙樹迴巒絕四鄰窺臨江海接崇飾四時新客有神仙  
者于茲雅麗陳名高清遠峽文聚斗牛津跡異心寧間  
聲同質豈均悠然千載後知我揖光塵

任華

華爵里未詳按撫言華與庾中丞書云華本野人  
嘗思漁釣尋常杖策歸乎舊山非有機心致斯扣  
擊是必狂狷之流也

松石軒詩評云任華之作如疾雷羈空長風蹴浪

卷十九  
飛電昏影重雲滿盈脩開脩闔一朗一晦凜耳疊  
日吁可怪也

古體詩

寄李白

古來文章有奔逸氣聳高格清人心神驚人魂魄我聞  
當今有李白大獵賦鴻猷文嗤長卿笑子雲班張所作  
瑣細不入眼未知卿雲得在嗤笑限登廬山觀瀑布海  
風吹不斷江月照還明余愛此兩句登天台望渤海雲



垂大鵬飛山壓巨鼇背斯言亦好在至于他作多不拘  
常律振擺超騰既俊且逸或醉中操紙或興來走筆手  
下忽然片雲飛眼前劃見孤峰出而我有時白日忽欲  
睡睡覺歛然起攘臂任生知有君君也知有任生未中  
間聞道在長安及余戾止君已江東訪元丹邂逅不得  
見君面每常把酒向東望良久見說往年在翰林胷中  
矛戟何森森新詩傳在宮人口佳句不離明主心身騎  
天馬多意氣目送飛鴻對豪貴承恩名入凡幾迴待詔

歸來仍半醉權臣妬盛名羣犬多吠聲有勅放君却歸  
隱淪處高歌大笑出關去且向東山為外臣諸侯交迓  
馳朱輪白壁一雙買交者黃金百鎰相知人平生傲岸  
其志不可測數十年為客未嘗一日低顏色八詠樓中  
坦腹眠五侯門下無心憶繁花越臺上細柳吳宮側綠  
水青山知有君白雲明月偏相識養高兼養閒可望不  
可攀莊周萬物外范蠡五湖間人傳訪道滄海上丁令  
玉喬每還往蓬萊經是曾到來方丈豈唯方一丈伊余

每欲乘興遠相尋  
江湖擁隔勞寸心  
今朝忽遇東飛翼  
寄此一章表曾臆  
儻能報我一片言  
但訪任華有人識

寄杜拾遺

杜拾遺名甫第二才甚竒  
任生與君別來已多時  
何嘗一日不相思  
杜拾遺知不知  
昨日有人誦得數篇黃絹  
詞吾怪異竒  
特借問果然稱是杜二之所為  
勢攫虎豹氣騰蛟螭  
滄海無風似鼓蕩  
華嶽平地欲奔馳  
曹劉俯仰慙大敵  
沈謝逡巡稱小兒  
昔在帝城中  
盛名君一個

諸人見所作無不心膽破郎官叢裏作狂歌丞相閣中  
常醉卧前年皇帝歸長安承恩濶步青雲端積翠扈遊  
花匝匝披香寓直月團欒英才特達承天睠公卿無不  
相欽羨只緣汲黯好直言遂使安仁却為掾如今避地  
錦城隅幕下英寮每日相隨提玉壺半醉起舞捋髭鬚  
乍低乍昂傍若無古人制禮但為防俗士豈得為君設  
之乎而我不飛不鳴亦何以只待朝廷有知己已曾讀  
却無限書拙詩一句兩句在人耳如今看之總無益又

不能崎嶇傍朝市且當事耕稼豈得便徒爾南陽葛亮  
為友朋東山謝安作鄰里閒常把琴弄悶即攜樽起鶯  
啼二月三月時花發千山萬山裏此時幽曠無人知火  
急將書憑驛使為報杜拾遺

懷素上人草書歌

吾嘗好奇古來草聖無不知豈不知右軍與獻之雖有  
壯麗之骨恨無狂逸之姿中間張長史獨放蕩而不羈  
以顛為名傾蕩于當時張老顛殊不顛于懷素懷素顛

乃是顛人謂爾從江南來我謂爾從天上來自顛狂之  
墨妙有墨狂之逸才狂僧前日動京華朝騎王公大人  
馬暮宿王公大人家誰不造素屏誰不塗粉壁粉壁搖  
晴光素屏凝曉霜待君揮灑兮不可弭忘駿馬迎來坐  
堂中金盃盛酒竹葉香十盃五盃不解意百盃已後始  
顛狂一顛一狂多意氣大叫一聲起攘臂揮毫倏忽千  
萬字有時一字兩字長丈二翕若長鯨撥刺動海島歛  
若長蛇戍律透深草回環繚繞相拘連千變萬化在眼

前飄風驟雨相擊射速祿颯拉動簷隙擲華山巨石以  
為點掣衡山陣雲以為畫輿不盡勢轉雄恐天低而地  
窄更有何處最可憐裊裊枯藤萬丈懸萬丈懸拂秋水  
映秋天或如絲或如髮風吹欲絕又不絕鋒芒利如歐  
冶劍勁直渾是并州鐵時復枯燥何襍襪忽覺陰山突  
兀橫翠微中有枯松錯落一萬丈倒挂絕壁感枯枝千  
魑魅兮萬魍魎欲出不可何閃屍又瀚海日暮愁陰濃  
忽然躍出千黑龍天矯偃蹇入乎蒼穹飛沙走石滿穹

塞萬里颼颼西北風狂僧有絕藝非數仞高牆不足以  
逞其筆勢或逢花箋與絹素凝神執筆守恒度別來筋  
骨多情趣霏霏微微點長露三秋月照丹鳳樓二月花  
開上林樹終恐絆騏驥之足不得展千里之步狂僧狂  
僧爾雖有絕藝猶當假良媒不因禮部張公將爾來如  
何得聲名一旦喧九垓

張若虛

若虛開元初入賀知章張旭號吳中四士



古體詩

春江花月夜

春江潮水連海平，海上明月共潮生。  
滌滌隨波千萬里，何處春江無月明。  
江流宛轉遶芳甸，月照花林皆似霰。  
空裏流霜不覺飛，汀上白沙看不見。  
江天一色無纖塵，皎皎空中孤月輪。  
江畔何人初見月，江月何年初照人。  
人生代代無窮已，江月年年祇相似。  
不知江月待何人，但見長江送流水。  
白雲一片去悠悠，青楓浦上不勝愁。

誰家今夜扁舟子何處相思明月樓可憐樓上月徘徊  
應照離人妝鏡臺玉戶簾中卷不去擣衣砧上拂還來  
此時相望不相聞願逐月華流照君鴻雁長飛光不度  
魚龍潛躍水成文昨夜閒潭夢落花可憐春半不還家  
江水流春去欲盡江潭落月復西斜斜月沈沈藏海霧  
碣石瀟湘無限路不知乘月幾人歸落月搖晴滿江樹

近體詩

代荅閨夢還

關塞年華早樓臺別望違  
試衫著暖氣開鏡覓春暉  
燕入窺羅幕蜂來上畫衣  
情催桃李豔心寄管絃飛  
妝洗朝相待風花暝不歸  
夢魂何處入寂寂掩重扉

李適之

適之一名昌恒山王承乾之孫  
神龍初拜左衛郎開元中歷官至刑部尚書雅好賓客飲酒一斗不亂天寶中為左相累封清和縣公與李林甫不叶為其陰中罷知政事貶宜春太守

近體詩

罷相作

避賢初罷相樂聖且銜杯借問門前客今朝幾個來

蔣冽

冽義興人進士及第歷禮吏戶三部侍郎尚書左丞見高智周傳

近體詩

南谿別業

結宇依青嶂開軒對綠疇樹交花兩色谿合水同流竹  
徑春來掃蘭樽夜不收逍遙自得意鼓腹醉中遊

金昌緒

昌緒餘杭人

近體詩

春怨

打卻黃鶯兒莫教枝上啼啼時驚妾夢不得到遼西

殷遙

遙句容人天寶間終於忠王府倉曹參軍

殷璠云遙詩閒雅善用聲律

近體詩

山行

寂歷青山曉山行趣不稀  
野花成子落江燕引雛飛  
暗草薰苔徑晴楊掃石磯  
俗人猶詣此余亦轉忘歸

陶峴

峴淵明之後開元末家崑山豐田疇

近體詩

西塞山下迴舟作

匡廬舊業是誰主  
吳越新居安此生  
白髮數莖歸未得  
青山一望計還成  
鴉翻楓葉夕陽動  
鷺立蘆花秋水明

從此舍舟何所詣  
酒旗歌扇正相迎

紀事云峴泛遊江湖自製三舟與孟

彥深孟雲卿焦燧共載吳越之士號為水仙省親南海  
獲崑崙奴名摩訶善遊水至西塞山下泊舟吉祥佛舍  
見江水深黑謂必有怪物投劍命摩訶下取久之支體  
磔裂浮于水上峴流涕迴棹賦詩自叙不復遊江湖矣

韋建

建嘗與蕭穎士遊見穎士傳

近體詩

泊舟盱眙

泊舟淮水次霜降夕流清夜久潮侵岸天寒月近城平  
沙依雁宿候館聽雞鳴鄉國雲霄外誰堪羈旅情

吳筠

筠字真節魯中儒士也舉進士不第依潘師正為  
道士善著述明皇聞其名遣使徵至待詔翰林高



力士素奉釋短筠于上前乃堅求還山東遊會稽  
往來天台剡中與李白孔巢父詩篇酬和終于越  
中弟子私諡宗玄先生所著文賦深詆釋氏為通  
人所譏然文彩煥發每製一篇人皆傳寫

近體詩

步虛詞

紫府與玄洲誰來物外遊無煩騎白鹿不用駕青牛  
金化顏應駐雲飛鬢不秋仍聞碧海上更用玉為樓

玉樹雜金花天河織女家月邊丹鳳鳥風送紫鸞車霧  
縠籠綃帶雲屏列錦霞瑤臺千萬里不覺往來賒

賈至

至字幼鄰洛陽人曾之子擢明經第為單父尉明  
皇幸蜀拜起居舍人知制誥撰肅宗冊文帝曰昔  
先天誥命乃父為之今又爾為之兩朝盛典出卿  
家父子手可謂繼美累封信都縣伯以右散騎常  
侍卒諡曰文

古體詩

送耿副使歸長沙

畫舸欲南歸江亭且留宴日暮湖上雲蕭蕭若流霞昨夜相知者明發不可見惆悵西北風高帆為誰扇

寓言

凜凜秋闈夕綺羅早知寒玉砧調鳴杵始擣機中紈憶昨別離日桐花覆井欄今來思君時白露盈堦溥聞有關河信欲寄雙玉盤玉以委貞心盤以薦嘉餐嗟君在

萬里使妾衣帶寬

巴陵寄李二戶部張十四禮部

時貶岳州司馬

江南春草初暮暮  
愁殺江南獨愁客  
秦中楊柳也應新  
轉憶秦中相憶人  
萬里鶯花不相見  
登高一望淚沾巾

近體詩

侍宴曲

雲陛蹇珠辰  
天墀覆綠楊  
隔簾妝隱映  
向席舞低昂  
鳴佩長廊靜  
開冰廣殿涼  
歡餘劍履散  
同輦入昭陽

岳陽樓宴王員外貶長沙

極浦三春草高樓萬里心  
楚山晴靄碧湘水暮流深  
忽與朝中舊同為澤畔吟  
停杯試北望還欲淚沾巾

詠馮昭儀當熊

白羽挿雕弓蜺旌動朔風  
平明出金屋扈輦上林中  
逐獸長廊靜呼鷹御苑空  
王孫莫諫獵賤妾解當熊

早朝大明宮呈兩省寮友

銀燭朝天紫陌長  
禁城春色曉蒼蒼  
千條弱柳垂青瑣

百轉流鶯繞建章  
劍珮聲隨玉墀步  
衣冠身惹御爐香  
共沐恩波鳳池上  
朝朝染翰侍君王

白馬

白馬紫連乾  
嘶鳴丹闕前  
聞珂自蹀躞  
不要下金鞭

贈薛瑤英

舞却銖衣重  
笑疑桃臉開  
方知漢成帝  
虛築避風臺

春思

草色青青柳色黃  
桃花歷亂李花香  
東風不為吹愁去

春日偏能惹恨長

紅粉當壚弱柳垂金花  
臘酒解醪釀笙歌日暮能留客  
醉殺長安輕薄兒

送李侍郎赴常州

雪晴雲散北風寒  
楚水吳山道路難  
今日送君須盡醉  
明朝相憶路漫漫

岳陽樓重宴別王八員外貶長沙

江路東連千里潮  
青雲北望紫微遙  
莫道巴陵湖水潤

長沙南畔更蕭條

初至巴陵與李十二白裴九同泛洞庭湖

楓岸紛紛落葉多  
洞庭秋色晚來波  
乘興輕舟無近遠  
白雲明月弔湘娥

西亭春望

日長風暖柳青青  
北雁歸飛入窅冥  
岳陽城上聞吹笛  
能使春心滿洞庭

御定全唐詩錄卷十九



欽定四庫全書

集部  
御定全唐詩錄卷二十

詳校官左中允<sub>臣</sub> 瑋五珠

主事銜<sub>臣</sub> 徐以坤覆勘

總校官原任中允<sub>臣</sub> 王燕緒

校對官中書<sub>臣</sub> 嵇承志

謄錄監生<sub>臣</sub> 李維瀛

欽定四庫全書

御定全唐詩錄卷二十

李白

白字太白興聖皇帝九世孫其先隋末以罪徙西域神龍初遁還客巴西白之生母夢長庚星因以命之十歲通詩書既長隱岷山州舉有道不應蘇頲爲益州長史見白異之曰是子天才奇特少益以學可比相如然喜縱橫術擊劍爲任俠輕財重

施更客任城與孔巢父韓準裴政張叔明陶沔居  
徂徠山日沈飲號竹溪六逸天寶初南入會稽與  
吳筠善筠被召故白亦至長安往見賀知章知章  
見其文歎曰子謫仙人也言於明皇召見金鑾殿  
論當世事奏頌一篇帝賜食親爲調羹有詔供奉  
翰林白猶與飲徒醉於市帝坐沉香亭子意有所  
感欲得白爲樂章召入而白已醉左右以水頰面  
稍解援筆成文婉麗精切無留思帝愛其才數宴

見白嘗侍帝醉使高力士脫鞵力士素愧耻之摘  
其詩以激楊貴妃帝欲官白妃輒阻止白自知不  
爲親近所容益醵放不自脩與賀知章李適之汝  
陽王璿崔宗之蘇晉張旭焦遂爲酒中八仙人懇  
求還山帝賜金放還白浮遊四方嘗乘舟與崔宗  
之自采石至金陵著宮錦袍坐舟中苟若無人安  
祿山反轉側宿松匡廬間永王璘辟爲府僚佐璘  
起兵逃回彭澤璘敗當誅初白遊并州見郭子儀

奇之子儀嘗犯法白為救免至是子儀請解官以贖有詔長流夜郎會赦還尋陽坐事下獄時宋若思將吳兵三千赴河南道尋陽釋囚辟為參謀未幾辭職李陽冰為當塗令白依之代宗立以左拾遺召而白已卒年六十餘白晚好黃老度牛渚磯至姑孰悅謝家青山欲終焉及卒葬東麓元和末宣歙觀察使范傳正祭其塚禁樵採訪後裔惟二孫女嫁為民妻進止仍有風範因泣曰先祖志在

青山頃葬東麓非本意傳正為改葬立二碑焉

南部新書云李白山東人父為任城尉因家焉稱蜀人非也今任城令廳有白之祠尚存唐范傳正誌其墓曰白涼武昭王九世孫昭王隴西人隋末子孫以罪徙西域神龍時白父客自西域逃居緜之巴西而白生焉唐魏穎李陽冰序其文劉全白撰其墓碣皆曰廣漢人故論白者或曰隴西或曰山東或曰蜀陽冰云李翰林浪跡縱酒以自昏穢

咏歎之際屢稱山東李白亦云以張洎讒逐遊海岱間子美所謂汝與山東李白好蓋白自號也

天寶遺事云李白於便殿對明皇撰詔誥時十月大寒筆凍莫能書字帝勅宮嬪數人侍於李白左右令各執牙筆呵之遂取而書其詔其受聖眷如此

古體詩

善哉行

來日一身攜糧負薪道長食盡苦口焦唇今日醉飽樂  
過千春仙人相存誘我遠學海凌三山陸憇五嶽乘龍  
天飛目瞻兩角授以神藥金丹滿握螭蛄蒙恩深媿短  
促思填東海強銜一木道重天地軒師廣成蟬翼九五  
以求長生下士大笑如蒼蠅聲

古風

大雅久不作吾衰竟誰陳王風委蔓草戰國多荆榛龍  
虎相啖食兵戈逮狂秦正聲何微茫哀怨起騷人揚馬



激頽波開流蕩無垠廢興雖萬變憲章亦已淪自從建  
安來綺麗不足珍聖代復元古垂衣貴清真羣才屬休  
明乘運共躍鱗文質相炳煥衆星羅秋旻我志在刪述  
垂輝映千春希聖如有立絕筆於獲麟

蟾蜍薄太清蝕此瑤臺月圓光虧中天金魄遂淪沒蟬  
竦入紫微大明夷朝暉浮雲隔兩曜萬象昏陰霏蕭蕭  
長門宮昔是今已非桂蠹花不實天霜下嚴威沈歎終

永夕感我涕沾衣

開元十二年七月廢  
皇后王氏故有此作

秦皇掃六合虎視何雄哉揮劍決浮雲諸侯盡西來明  
斷自天啓大畧駕羣才收兵鑄金人函谷正東開銘功  
會稽嶺騁望琅邪臺刑徒七十萬起土驪山隈尚採不  
死藥茫然使心哀連弩射海魚長鯨正崔嵬額鼻象五  
嶽揚波噴雲雷鬣蔽青天何由覩蓬萊徐市載秦女  
樓船幾時迴但見三泉下金棺葬寒灰

鳳飛九千仞五章備綵珍銜書且虛歸空入周與秦橫  
絕歷四海所居未得鄰吾營紫河車千載落風塵藥物

祕海嶽採鉛青溪濱時登大樓山舉首望仙真羽駕滅  
去影飈車絕迴輪尚恐丹液遲志願不及申徒霜鏡中  
髮羞彼鶴上人桃李何處開此花非我春唯應清都境  
長與韓衆親

太白何蒼蒼星辰上森列去天三百里邈爾與世絕中  
有綠髮翁披雲卧松雪不笑亦不語冥棲在巖穴我來  
逢真人長跪問寶訣粲然忽自哂授以鍊藥說銘骨傳  
其語竦身已電滅仰望不可及蒼然五情熱吾將營丹

砂永與世人別

代馬不思越越禽不戀燕情性有所習土風固其然昔  
別雁門關今戍龍庭前驚沙亂海日飛雪迷遙天蟻蝨  
生虎鴟之魂逐旌旃苦戰功不賞忠誠難可宣誰憐李  
飛將白首沒三邊

客有鶴上仙飛飛凌太清揚言碧雲裏自道安期名兩  
兩白玉童雙吹紫鸞笙去影忽不見迴風送天聲舉首  
遠望之飄然若流星願餐金光草壽與天齊傾

卷二十一  
卷二十一  
咸陽二三月宮柳黃金枝綠幘誰家子賣珠輕薄兒日  
莫醉酒歸白馬驕且馳意氣人所仰冶遊方及時子雲  
不曉事晚獻長楊辭賦達身已老草玄鬢若絲投閣良  
可歎但為此輩嗤

莊周夢蝴蝶蝴蝶為莊周一體更變易萬事良悠悠乃  
知蓬萊水復作清淺流青門種瓜人舊日東陵侯富貴  
固如此營營何所求

齊有個儻生魯連特高妙明月出海底一朝開光耀却

秦振英聲後世仰  
末照意輕千金贈  
顧向平原笑吾亦  
澹蕩人拂衣可同調

黃河走東溟  
白日落西海  
逝川與流光  
飄忽不相待  
春容捨我去  
秋髮已衰改  
人生非寒松  
年貌豈長在  
吾當乘雲螭  
吸景駐光彩

松栢本孤直  
難為桃李顏  
昭昭嚴子陵  
垂釣滄波間  
身將客星隱  
心與浮雲閒  
長揖萬乘君  
還歸富春山  
清風灑六合  
邈然不可攀  
使我長歎息  
冥棲巖石間

君平既棄世世亦棄君平觀變窮太易探元化羣生寂  
寞綴道論空簾閉幽情騶虞不虛來鸞鷲有時鳴安知  
天漢上白日懸高名海客去已久誰人測沈冥

邊關饒風沙蕭索竟終古木落秋草黃登高望塞虜荒  
城空大漠邊邑無遺堵白骨橫千霜嵯峨蔽榛莽借問  
誰陵虐天驕毒威武赫怒我聖皇勞師事鞞鼓陽和變  
殺氣發卒騷中土三十六萬人哀哀淚如雨且悲就行  
役安得營農圃不見征戍兒豈知關山苦李牧今不在

邊人飼豺虎

燕昭延郭隗遂築黃金臺劇辛方趙至鄒衍復齊來  
奈何青雲士棄我如塵埃珠玉買歌笑糟糠養賢才  
方知黃鶴舉千里獨徘徊

寶劍雙蛟龍雪花照芙蓉精光射天地雷騰不可衝  
一去別金匣飛沈失相從風胡去已久所以潛其鋒  
吳水溪萬丈楚山邈千重雌雄終不隔神物會當逢

天津三月時千門桃與李朝為斷腸花莫逐東流水  
前



水復後水古今相續流新人非舊人年年橋上遊雞鳴  
海色動謁帝羅公侯月落西上陽餘輝半城樓衣冠照  
雲日朝下散皇州鞍馬如飛龍黃金絡馬頭行人皆辟  
易志氣橫嵩丘入門上高堂列鼎錯珍羞香風引趙舞  
清管隨齊謳七十紫鴛鴦雙雙戲庭幽行樂爭晝夜自  
言度千秋功成身不退自古多愆尤黃犬空嘆息綠珠  
成釁讎何如鷓鴣夷子散髮棹扁舟

泣與親友別欲語再三咽勗君青松心努力保霜雪世

路多險艱白日欺紅顏分手各千里去去何時還

在世復幾時倏如飄風度空聞紫金經白首愁相誤撫  
已忽自笑沈吟為誰故名利徒煎熬安得閒余步終留  
赤玉烏東上蓬山路秦帝如我求蒼蒼但煙霧

郢客吟白雪遺響飛青天徒勞歌此曲舉世誰為傳試  
為巴人唱和者乃數千吞聲何足道歎息空悽然

秦水別隴首幽咽多悲聲胡馬顧朔雪躩蹠長嘶鳴感  
物動我心緬然含歸情昔視秋蛾飛今見春蠶生嫋嫋

桑柘葉萋萋柳垂紫急節謝流水羈心搖懸旌揮涕且  
復去惻愴何時平

秋露如白玉團團下庭綠我行忽見之寒早悲歲促人  
生鳥過目胡乃自結束景公一何愚牛山淚相續物苦  
不知足得隴又望蜀人心若波瀾世路有屈曲三萬六  
十日夜夜當秉燭

世道日交喪澆風散淳源不采芳桂枝反棲惡木根所  
以桃李樹吐花竟不言大運有興沒羣動爭飛奔歸來

廣成子去入無窮門

碧荷生幽泉朝日艷且鮮  
秋花冒綠水密葉羅青煙  
秀色空絕世馨香誰為傳  
坐看飛霜滿凋此紅芳年  
結根未得所願託華池邊

燕趙有秀色綺樓青雲端  
眉目艷皎月一笑傾城歡  
常恐碧草晚坐泣秋風寒  
纖手怨玉琴清晨起長歎  
焉得偶君子共乘雙飛鸞

容顏若飛電時景如飄風  
草綠霜已白日西月復東  
華

鬢不耐秋颯然成衰蓬古來賢聖人一一誰成功君子  
變猿鶴小人為沙蟲不及廣成子乘雲駕輕鴻

三季分戰國七雄成亂麻王風何怨怒世道終紛拏至  
人洞玄象高舉凌紫霞仲尼欲浮海吾祖之流沙聖賢  
共淪沒臨岐胡咄嗟

玄風變太古道喪無時還擾擾李葉人雞鳴趨四關但  
識金馬門誰知蓬萊山白首死羅綺笑歌無時閒綠酒  
晒丹液青娥凋素顏大儒揮金槌琢之詩禮間蒼蒼三

珠樹冥目焉能攀

羽檄如流星虎符合專城  
喧呼救邊急羣鳥皆夜鳴  
白日曜紫微三公運權衡  
天地皆得一澹然四海清  
借問何以爲荅言楚徵兵  
渡瀘及五月將赴雲南征  
怯卒非戰士炎方難遠行  
長號別嚴親日月慘光晶  
泣盡繼以血心摧兩無聲  
困獸當猛虎窮魚餌奔鯨  
千去不一迴投軀豈全生  
如何舜干戚一使有苗平

天寶九載南詔陷雲南楊國忠

使鮮于仲通將兵討之大敗士卒死者六萬人白詩爲此而作

燕臣昔慟哭五月飛秋霜庶女號蒼天震風擊齊堂精  
誠有所感造化為悲傷而我竟何辜遠身金殿倚浮雲  
蔽紫闥白日難迴光羣沙穢明珠衆草凌孤芳古來共  
歎息流淚空沾裳

孤蘭生幽園衆草共蕪沒雖照陽春暉復悲高秋月飛  
霜早淅瀝綠艷恐休歇若無清風吹香氣為誰發

登高望四海天地何漫漫霜被羣物秋風飄大荒寒榮  
華東流水萬事皆波瀾白日掩徂暉浮雲無定端梧桐

巢燕雀枳棘棲鳩鷺且復歸去來劍歌行路難

鳳饑不啄粟所食唯琅玕焉能與羣雞處促爭一餐朝  
鳴崑丘樹夕飲砥柱湍歸飛海路遠獨宿天霜寒幸遇  
王子晉結交青雲端懷恩未得報感別空長嘆

朝弄紫泥海夕披丹霞裳揮手折若木拂此西日光雲  
卧遊八極玉顏已千霜飄飄入無倪稽首祈上皇呼我  
遊太素玉杯賜瓊漿一餐歷萬歲何用還故鄉永隨長  
風去天外恣飄揚



桃花開東園含笑誇白日偶蒙春風榮生此艷陽質豈  
無佳人色但恐花不實宛轉龍火飛零落早相失詎知  
南山松獨立自蕭颯

美人出南國灼灼芙蓉姿皓齒終不發芳心空自持由  
來紫宮女共妬青蛾眉歸去瀟湘沚沈吟何足悲

青春流驚湍朱明驟迴薄不忍看秋蓬飄揚竟何託光  
風滅蘭蕙白露灑葵藿美人不我期草木日零落

倚劒登高臺悠悠送春日蒼榛蔽層丘瓊草隱深谷鳳

凰鳴西海欲集無珍木鸞斯得所居蒿下盈萬族晉風  
日已頽窮途方慟哭

越客採明珠提攜出南隅清輝照海月美價傾鴻都獻  
君君按劔懷寶空長吁魚目復相哂寸心增煩紆

惻惻泣路岐哀哀悲素絲路岐有南北素絲易變移萬  
事固如此人生無定期田竇相傾奪賓客互盈虧世途  
多翻覆交道方嶮巖斗酒強然諾寸心終自疑張陳竟  
火滅蕭朱亦星離衆鳥集榮柯窮魚守枯池嗟嗟失懼

客勤問何所規

擬古

青天何歷歷明星如白石黃姑與織女相去不盈尺銀  
河無鵲橋非時將安適閨人理紈素遊子悲行役瓶冰  
知冬寒霜露欺遠客客似秋葉飛飄颻不言歸別後羅  
帶長愁寬去時衣乘月託宵夢因之寄金徽

高樓入青天下有白玉堂明月看欲墮當窗懸清光遙  
夜一美人羅衣沾秋霜含情弄柔瑟彈作陌上桑絃聲

何激烈風卷遶飛梁行人皆躑躅棲鳥去迴翔但寫妾  
意苦莫辭此曲傷願逢同心者飛作紫鴛鴦

長繩難繫日自古共悲辛黃金高北斗不惜買陽春石  
火無留光還如世中人即事已如夢後來我誰身提壺  
莫辭貧取酒會四鄰仙人殊恍惚未若醉中真

清都綠玉樹灼爍瑤臺春攀花弄秀色遠贈天仙人香  
風送紫蓋直到扶桑津取掇世上艷所貴心之珍相思  
傳一笑聊欲示情親

今日風日好明日恐不如春風笑於人何乃愁自居吹  
簫舞彩鳳酌醴繪神魚千金買一醉取樂不求餘達士  
遺天地東門有二疏愚夫同瓦石有才知卷舒無事坐  
悲苦塊然涸轍鮒

運速天地閉朔風結飛霜百草死冬月六龍頽西荒太  
白出東方彗星揚精光鴛鴦非越鳥何為眷南翔惟昔  
鷹將犬今為侯與王得水成蛟龍爭池奪鳳凰北斗不  
酌酒南箕空簸揚

世路今太行迴車竟何託萬族皆凋枯遂無少可樂曠  
野多白骨幽魂共銷鑠榮貴當及時春華宜照灼人非  
崑山玉安得長璀璨身沒豈不朽榮名在麟閣

月色不可掃客愁不可道玉露生秋衣流螢飛百草日  
月終銷毀天地同枯槁蟪蛄啼青松安見此樹老金丹  
寧誤俗昧者難精討爾非千歲翁多恨去世早飲酒入  
玉壺藏身以為寶

生者為過客死者為歸人天地一逆旅同悲萬古塵月

兔空擣藥扶桑已成薪白骨寂無言青松豈知春前後  
更嘆息浮榮何足珍

仙人騎綵鳳昨下閨風峯海水三清淺桃源一見尋遺  
我綠玉杯兼之紫瓊琴杯以傾美酒琴以閒素心二物  
非世有何論珠與金琴彈松裏風杯勸天上月風月長  
相知世人何倏忽

涉江弄秋水愛此荷花鮮攀荷弄其珠蕩漾不成圓佳  
期綵雲重欲贈隔遠天相思無由見悵望涼風前

去去復去去辭君還憶君漢水既殊流楚山亦此分  
人生難稱意豈得長為羣越燕喜海日燕鴻思朔雲別久  
容華晚琅玕不能飯日落知天昏夢長覺道遠望夫登  
高山化石竟不返

關山月

明月出天山蒼茫雲海間長風幾萬里吹度玉門關漢  
下白登道胡窺青海灣由來征戰地不見有人還戍客  
望邊邑思歸多苦顏高樓當此夜歎息未應閒



俠客行

趙客縵胡纓，吳鉤霜雪明。  
銀鞍照白馬，颯沓如流星。  
十步殺一人，千里不留行。  
事了拂衣去，深藏身與名。  
閒過信陵飲，脫劍膝前橫。  
將炙啖朱亥，持觴勸侯嬴。  
三杯吐然諾，五嶽倒為輕。  
眼花耳熱後，意氣素霓生。  
救趙揮金槌，邯鄲先震驚。  
千秋二壯士，烜赫大梁城。  
縱死俠骨香，不慙世上英。  
誰能書閣下，白首太玄經。

長干行

妾髮初覆額折花門前劇郎騎竹馬來遶牀弄青梅同  
居長千里兩小無嫌猜十四為君婦羞顏未嘗開低頭  
向暗壁千喚不一迴十五始展眉願同塵與灰常存抱  
柱信豈上望夫臺十六君遠行瞿塘艷瀕堆五月不可  
觸猿聲天外哀門前遲行跡一一生綠苔苔深不能掃  
落葉秋風早八月蝴蝶來雙飛西園草感此傷妾心坐  
愁紅顏老早晚下三巴預將書報家相迎不道遠直至  
長風沙

憶妾深閨裏煙塵不曾識嫁與長干人沙頭候風色五  
月南風興思君下巴陵八月西風起想君發揚子去來  
悲如何見少離別多湘潭幾日到妾夢越風波昨夜狂  
風度吹折江頭樹森森暗無邊行人在何處好乘浮雲  
驄佳期蘭渚東鴛鴦綠蒲上翡翠錦屏中自憐十五餘  
顏色桃花紅那作商人婦愁水復愁風

古朗月行

小時不識月呼作白玉盤又疑瑤臺鏡飛上青雲端仙

人垂兩足桂樹作團團白兔擣藥成問言誰與餐蟾蜍  
蝕圓影大明夜已殘羿昔落九烏天人清且安陰精此  
淪惑去去不足觀憂來其如何悽愴摧心肝

獨不見

白馬誰家子黃龍邊塞兒天山三丈雪豈是遠行時春  
蕙忽秋草莎雞鳴西池風摧寒椽響月入霜閨悲憶與  
君別年種桃齊蛾眉桃今百餘尺花落成枯枝終然獨  
不見流淚空自知

妾薄命

漢帝寵阿嬌貯之黃金屋咳唾落九天隨風生珠玉寵  
極愛還歇妬深情却疎長門一步地不肖暫迴車雨落  
不上天水覆難再收君情與妾意各自東西流昔日芙  
蓉花今成斷根草以色事他人能得幾時好

黃葛篇

黃葛生洛溪黃花自綿累青煙蔓長條繚繞幾百尺閨  
人費素手採緝作絺綌縫為絕國衣遠寄日南客蒼梧

大火落暑服莫輕擲此物雖過時是妾手中跡

白馬篇

龍馬花雪毛金鞍五陵豪秋霜切玉劍落日明珠袍鬪  
雞事萬乘軒蓋一何高弓摧南山虎手接太行猱酒後  
競風采三杯弄寶刀殺人如剪草劇孟同遊遨發憤去  
函谷從軍向臨洮叱咤萬戰場匈奴盡奔逃歸來使酒  
氣未肯拜蕭曹羞入原憲室荒徑隱蓬蒿

大堤曲

漢水橫襄陽花開大堤暖佳期大隄下淚向南雲滿春  
風復無情吹我夢魂散不見眼中人天長音信斷

東武吟

好古笑流俗素聞賢達風方希佐明主長揖辭成功白  
日在髙天迴光燭微躬恭承鳳凰詔歛起雲蘿中清切  
紫霄迴優游丹禁通君王賜顏色聲價凌煙虹乘輿擁  
翠蓋扈從金城東寶馬麗絕景錦衣入新豐依巖望松  
雪對酒鳴絲桐因學揚子雲獻賦甘泉宮天書美片善

清芬播無窮一朝去金馬飄落成飛蓬賓客日疎散玉  
樽亦已空才力猶可倚不慙世上雄閒作東武吟曲盡  
情未終書此謝知己吾尋黃綺翁

邯鄲才人嫁為廝養卒婦

妾本叢臺女揚蛾入丹闕自倚顏如花寧知有凋歇一  
辭玉階下去若朝雲沒每憶邯鄲城深宮夢秋月君王  
不可見惆悵至明發

短歌行



白日何短短百年苦易滿蒼穹浩茫茫萬劫太極長麻  
姑垂兩鬢一半已成霜天公見玉女大笑億千場吾欲  
攬六龍迴車掛扶桑北斗酌美酒勸龍各一觴富貴非  
所願與人駐顏光

相逢行

朝騎五花馬謁帝出銀臺秀色誰家子雲車珠箔開金  
鞭遙指點玉勒近遲回夾轂相借問疑從天上來蹙入  
青綺門當歌共銜杯銜杯映歌扇似月雲中見相見不

得親不如不相見相見情已深未語可知心胡為守空  
閨孤眠愁錦衾錦衾與羅幃纏綿會有時春風正澹蕩  
暮雨來何遲願因三青鳥更報長相思光景不待人須  
史髮成絲當年失行樂老去徒傷悲持此道密意毋令  
曠佳期

沐浴子

沐芳莫彈冠浴蘭莫振衣處世忌太潔至人貴藏輝滄  
浪有釣叟吾與爾同歸

春思

燕草如碧絲，秦桑低綠枝。  
當君懷歸日，是妾斷腸時。  
春風不相識，何事入羅幃。

子夜吳歌

秦地羅敷女，採桑綠水邊。  
素手青條上，紅妝白日鮮。  
蠶飢妾欲去，五馬莫留連。

鏡湖三百里，菡萏發荷花。  
五月西施採，人看隘若耶。  
回舟不待月，歸去越王家。

長安一片月萬戶擣衣聲  
秋風吹不盡總是玉關情  
何日平戎虜良人罷遠征

明朝驛使發一夜絮征袍  
素手抽針冷那堪把剪刀  
裁縫寄遠道幾日到臨洮

對酒行

松子棲金華安期入蓬海  
此人古之仙羽化竟何在  
浮生速流電倏忽變光彩  
天地無彫換容顏有遷改  
對酒不肯飲含情欲誰待

秋浦歌

秋浦長似秋蕭條使人愁客愁不可度行上東大樓正  
西望長安下見江水流寄言向江水汝意憶儂不遙傳  
一掬淚為我達揚州

千千石楠樹萬萬女貞林山山白鷺滿澗澗白猿吟君  
莫向秋浦猿聲碎客心

清溪行

清溪清我心水色異諸水借問新安江見底何如此人

行明鏡中鳥度屏風裏向晚猩猩啼空悲遠遊子

秋日鍊藥院鑷白髮贈元六兄林宗

木落識歲秋瓶冰知天寒桂枝日已綠拂雪凌雲端弱  
齡接光景矯翼攀鴻鸞投分三十載榮枯同所歡長吁  
望青雲鑷白坐相看秋顏入曉鏡壯髮凋危冠窮與鮑  
生賈饑從漂母食時來極天人道在豈吟嘆樂毅方適  
趙蘇秦初說韓卷舒固在我何事空摧殘

書情贈蔡舍人雄

嘗高謝太傅攜妓東山門楚舞醉碧雲吳歌斷清猿暫  
因蒼生起談笑安黎元余亦愛此人丹霄冀飛翻遭逢  
聖明主敢進興亡言白璧竟何辜青蠅遂成寃一朝去  
京國十載客梁園猛犬吠九關殺人憤精魂皇穹雪寃  
枉白日開昏氛泰階得夔龍桃李滿中原倒海索明月  
凌山採芳蓀愧無橫草功虛負雨露恩跡謝雲臺閣心  
隨天馬轅夫子王佐才而今復誰論層飈振六翮不日  
思騰騫我縱五湖棹煙濤恣崩奔夢釣子陵湍英風緬

猶存彼希客星隱弱植不足援千里  
回首萬里一長歌黃鶴不復來清風愁奈何  
舟浮瀟湘月山倒洞庭波投汨笑古人  
臨濠得天和間時田畝中搔背牧雞鵝  
別離解相訪應在武陵多

叙舊贈江陽宰陸調

太伯讓天下仲雍揚波濤清風蕩萬古跡與星辰高  
開吳食東溟陸氏世英髦多君秉古節嶽立冠人曹  
風流少年時京洛事遊遨晉間延陵劍玉帶明珠袍  
我昔鬪



雞徒連延五陵豪，邀遮相組織，呵嚇來煎熬。君開萬人  
叢，鞍馬皆辟易，告急清憲臺。脫余北門厄，間宰江陽邑。  
剪棘樹蘭芳，城門何肅穆。五月輝秋霜，好鳥集珍木。高  
才列華堂，侍從府中歸。絲管儼成行，但苦隔遠道。無由  
共銜觴，江北荷花開。江南楊梅熟，正好飲酒時。懷賢在  
心目，掛席拾海月。乘風下長川，多沽新豐醪。滿載剡溪  
船，中途不遇人。直到爾門前，大笑同一醉。取樂平生年。

贈武十七諤

并序

門人武諤深於義者也質木沈悍慕要離之風  
潛釣川海不數數於世間事聞中原作難西來  
訪余余愛子伯禽在魯許將冒兵烽以致之酒  
酣感激援筆而贈

馬如一匹練明日過吳門乃是要離客西來欲報恩笑  
開燕匕首拂拭竟無言狄犬吠清洛天津成塞垣愛子  
隔東魯空悲斷腸猿林回棄白璧千里阻同奔君為我  
致之輕齋涉淮源精誠合天道不愧遠遊魂

經亂離後天恩流夜郎憶舊遊書懷贈江夏韋太  
守良宰

天上白玉京十二樓五城仙人撫我頂結髮受長生誤  
逐世間樂頗窮理亂情九十六聖君浮雲掛空名天地  
賭一擲未能忘戰爭試涉霸王畧將期軒冕榮時命乃  
大謬棄之海上行學劍翻自哂為文竟何成劍非萬人  
敵文竊四海聲兒戲不足道五噫出西京臨當欲去時  
慷慨淚沾纓嘆君倜儻才標舉冠羣英開筵引祖帳慰

此遠徂征鞍馬若浮雲送余驃騎亭歌鐘不盡意白日  
落昆明十月到幽州戈鋌若羅星君王棄北海掃地借  
長鯨呼吸走百川燕然可摧傾心知不得語却欲棲蓬  
瀛彎弧懼天狼挾矢不敢張攬涕黃金臺呼天哭昭王  
無人貴駿骨駮耳空騰驥樂毅儻再生於今亦奔亡蹉  
跎不得意驅馬還貴鄉逢君聽絃歌肅穆坐華堂百里  
獨太古陶然卧羲皇徵樂昌樂館開筵列壺觴賢豪間  
青娥對燭儼成行醉舞紛綺席清歌遠飛梁歡娛未終

朝秩滿歸咸陽祖道擁萬人供帳遙相望一別隔千里  
榮枯異炎涼炎涼幾度改九土中橫潰漢甲連燕兵沙  
塵暗雲海草木搖殺氣星辰無光彩白骨成丘山蒼生  
竟何罪幽關壯帝居國命懸哥舒長戟三十萬開門納  
兇渠公卿如犬羊忠讜醢與菹二聖出遊豫兩京遂丘  
墟帝子許專征秉旄控強楚節制非桓文軍師擁熊虎  
人心失去就賊勢騰風雨惟君固房陵誠節冠終古僕  
卧香爐頂飡霞漱瑶泉門開九江轉枕下五湖連半夜

水軍來尋陽滿旌旃空名適自誤迫脅上樓船徒賜五  
百金棄之若浮煙辭官不受賞翻謫夜郎天夜郎萬里  
道西上令人老掃蕩六合清仍為負霜草日月無偏照  
何由訴蒼昊良牧稱神明深仁恤交道一忝青雲客三  
登黃鶴樓顧慙禰處士虛對鸚鵡洲樊山霸氣盡寥落  
天地秋江帶峨眉雪川橫三峽流萬舸此中來連帆過  
揚州送此萬里目曠然散我愁紗窗倚天開水樹綠如  
髮窺日畏銜山促酒喜見月吳娃與越艷窈窕誇鉛紅

呼來上雲梯含笑出簾櫳對客小垂手羅衣舞春風賓  
跪請休息主人情未極覽君荆山作江鮑堪動色秋水  
出芙蓉天然去雕飾逸興橫素襟無時不招尋朱門擁  
虎士列戟何森森剪鑿竹石開滎流漲清深登臺坐水  
閣吐論多英音片辭貴白璧一諾輕黃金謂我不愧君  
青鳥明丹心五色雲間鵲飛鳴天上來傳聞赦書至却  
放夜郎迴暖氣變寒谷炎煙生死灰君登鳳池去忽棄  
賈生才桀犬尚吠堯凶奴笑千秋中夜四五嘆常為大

國憂旌旆夾兩山  
黃河當中流連難  
不得進飲馬空夷  
猶安得羿善射一  
箭落旄頭

贈盧司戶

秋色無遠近出門  
盡寒山白雲遙相  
識待我蒼梧間借  
問盧耽鶴西飛幾  
歲還

贈別舍人弟臺卿之江南

去國客行遠還山  
秋夢長梧桐落金  
井一葉飛銀牀覺  
罷攬明鏡鬢毛颯  
已霜良圖委蔓草  
古貌成枯桑欲道



心下事時人疑夜光因為洞庭葉飄落之瀟湘令弟經  
濟士謫居我何傷潛蚪隱尺水著論談興亡客遇王子  
喬口傳不死方入洞過天地登真朝玉皇吾將撫爾背  
揮手遂翱翔

贈宣城宇文太守兼呈崔侍御

白若白鷺鮮清如清唳蟬受氣有本性不為外物遷飲  
水箕山上食雪首陽巔迴車避朝歌掩口去盜泉岩堯  
廣成子侗魯仲連卓絕二公外丹心無間然昔攀六

龍飛今作百鍊鉛懷恩欲報主投佩向北燕彎弓綠弦  
開滿月不憚堅閒騎駿馬獵一射兩虎穿回旋若流光  
轉背落雙鳶胡虜三嘆息兼知五兵權鎗鎗突雲將却  
掩我之妍多逢勦絕兒生著祖生鞭據鞍空矍鑠壯志  
竟誰宣蹉跎復來歸憂恨坐相煎無風難破浪失計長  
江邊危苦惜顏光金波忽三圓時遊敬亭上閒聽松風  
眠或弄宛溪月虛舟信洄沿顏公二十萬盡付酒家錢  
興發每取之聊向醉中仙過此無一事靜談秋水篇君

從九卿來水國有豐年魚鹽滿市井布帛如雲煙下馬  
不作威冰壺照清川霜眉邑中叟皆美太守賢時時慰  
風俗往往出東田竹馬數小兒拜迎白鹿前含笑問使  
君日晚可迴旋遂歸池上酌掩抑清風絃曾標橫浮雲  
下撫謝朓肩樓高碧海出樹古青蘿懸光祿紫霞杯伊  
昔忝相傳良圖掃沙漠別夢繞旌旃富貴日成疎願言  
杳無緣登龍有直道倚玉阻芳筵敢獻繞朝策思同郭  
泰船何言一水淺似隔九重天崔生何傲岸縱酒復談

玄身為名公子英才苦迤邐鳴鳳托高梧凌風何翩翩  
安知慕羣客彈劔拂秋蓮

自梁園至敬亭山見會公談陵陽山水兼期同遊  
因有此贈

我隨秋風來瑤草恐衰歇中途寡名山安得弄雲月渡  
江如昨日黃葉向人飛敬亭愜素尚弭棹流清輝冰谷  
明且秀陵巒抱江城粲粲吳與史衣冠耀天京水國饒  
英奇潛光卧幽草會公真名僧所在即為寶開堂振白

拂高論橫青雲雪山掃粉壁墨客多新文為余話幽棲  
且述陵陽美天開白龍潭月映清秋水黃山望石柱突  
兀誰開張黃鶴久不來予安在蒼茫東南焉可窮山鳥  
飛絕處稠疊千萬峯相連入雲去聞此期振策歸來空  
閉關相思如明月可望不可攀何當移白足早晚凌蒼  
山且寄一書札令予解愁顏

贈閻丘處士

賢人有素業乃在沙塘陂竹影掃秋月荷花落古池閒

讀山海經散帙卧遙帷且耽田家樂遂曠林中期野酌  
勸芳酒園蔬烹露葵如能樹桃李為我結茅茨

經亂後將避地剡中留贈崔宣城

雙鷺飛洛陽五馬渡江徼何意上東門胡雛更長嘯中  
原走豺虎烈火及宗廟太白晝經天頽陽掩餘照名城  
皆蕩覆世路成奔峭四海望長安嘯蒼寡西笑蒼生疑  
落葉白骨空相吊連兵似雪山破敵誰能料我垂北溟  
翼且學南山豹崔子賢主人歡娛每相召胡床紫玉笛

却坐青雲叫楊花滿州城置酒同臨眺忽思剡溪去水  
石遠清妙雪晝天地明風開湖山貌悶為洛生詠醉發  
吳越調赤霞動金光日足森海嶠獨散萬古意閒垂一  
溪釣猿近天上啼人移月邊棹無以墨綬苦來求丹砂  
要華髮長折腰將貽陶公誚

安陸白兆山桃花嶽寄劉侍御綰

雲卧三十年好閒復愛仙蓬壺雖冥絕鸞鶴心悠然歸  
來桃花嶽得憇雲窗眠對嶺人共語飲潭猿相連時昇

翠微上邈若羅浮巔兩岑抱東壑一嶂橫西天樹雜日  
易隱崖傾月難圓芳草換野色飛蘿搖春煙入遠構石  
室選幽開山田獨此林下意杳無區中緣永辭霜臺客  
千載方來旋

望終南山寄紫閣隱者

出門見南山引領意無限秀色難為名蒼翠日在眼有  
時白雲起天際自舒卷心中與之然託興每不淺何當  
造幽人滅跡棲絕巘



夕霽杜陵登樓寄韋繇


浮陽滅霽景萬物生秋容登樓送遠目伏檻觀羣峯原  
野曠超緬關河紛雜重清輝映竹日翠色明雲松蹈海  
寄遐想還山迷舊蹤徒然迫晚暮未果諧心曾結桂空  
佇立折麻恨莫從思君達永夜長樂聞疎鐘

秋夜宿龍門香山寺奉寄王方城十七丈奉國營

上人從弟幼成令問

朝發汝海東莫棲龍門中水寒夕波急木落秋山空望

極九霄迴賞幽萬壑通目皓沙上月心清松下風玉斗  
橫網戶銀河耿花宮興在趣方逸歡餘情未終鳳駕憶  
王子虎溪懷遠公桂枝坐銷歇棣華不復同流恨寄伊  
水盈盈焉可窮



御定全唐詩錄卷二十

御定全唐詩錄

卷二十